



Broj: X-K/07/460

Sarajevo, 25.02.2008 godine

Суд БиХ / Суд Б.Х. Кривично одјељење I Апелационо одјељење / Кривично одјељење и Апелационо одјељење Одјел I / Одјел II / Одјел I и Одјел II Одјељење за судску управу / Одјељење за судску управу	
x - K/07/460	134
28-02-2008	6 (Str./Стр.) 1360

U IME BOSNE I HERCEGOVINE!

Sud Bosne i Hercegovine, sudija Nenad Šeleta, uz sudjelovanje pravnog saradnika Bojana Avramovića u svojstvu zapisničara, u krivičnom predmetu protiv optuženih Baftijari Fatona i Jasmina Mahmutovića, zbog krivičnog djela krijumčarenja osoba iz člana 189. stav 1. u vezi sa članom 29. Krivičnog zakona Bosne i Hercegovine (u daljem tekstu KZ BiH) povodom optužnice Tužilaštva Bosne i Hercegovine broj KT-444/07 od 24.12.2007. godine, nakon održanog pretresa za izricanje krivičnopravne sankcije povodom sporazuma o priznanju krivnje, u prisutnosti tužioca Tužilaštva Bosne i Hercegovine Jasmine Gafić, optuženih Baftijari Fatona i Jasmina Mahmutovića i branioca optuženog Baftijari Fatona, Senada Dupovca, advokata iz Hadžića, donio je i javno objavio dana 25.02.2008. godine sljedeću

P R E S U D U

1. **BAFTIJARI FATON**, sin Isa i majke Naide rođ. Ajeti, rođen 17.06.1983 godine u Gnjilanu, nastanjen u ulici M.Trumpića broj 43. Gnjilane, po zanimanju poljoprivredni tehničar, nezaposlen, neoženjen, po nacionalnosti Albanac, državljanin R.Srbije, JMBG 1706983974981, nalazi se u pritvoru po rješenju toga Suda broj: X-KRN-07/460 od 06.11.2007 godine, koji je produžen rješenjima Suda BiH broj: X-KRN-07/460 od 03.12.2007 godine i broj: X-K/07/460 od 17.01.2008 godine po kojem pritvor može trajati do okončanja glavnog pretresa, a najduže jednu godinu od dana potvrđivanja optužnice, ili do nove odluke Suda.

2. **MAHMUTOVIĆ JASMIN**, sinu Hasana i majke Tehvide rođ. Raković, rođen 11.06.1978 godine u Cazinu, stalno nastanjen u mjestu Krakača broj 139 općina Cazin, po zanimanju tesar, nezaposlen, neoženjen, po nacionalnosti Bošnjak, državljanin BiH, JMBG 1106978112486.

KRIVI SU

što su:

Dana 03.11.2007 godine oko 20,30 sati u Bihaću, po prethodnom dogovoru, a u organizaciji Mehić Hasiba i Ismailji Hasana zv. „Cani“, koji su za poslove prevoženja i prevođenja ilegalnih imigranata uglavnom Albanaca sa Kosova za odlazak u zemlje Zapadne Evrope angažovali više NN lica, pa tako i Mahmutović Jasmina i Baftijari Fatona da u njihovoj organizaciji, a za određeni novčani iznos - iz koristoljublja Mahmutović prevozi, a Baftijari Faton provodi kroz šumu ilegalne imigrante, u ovom slučaju prema Italiji i Austriji, prihvatili ovaj posao i to tako što bi Mahmutović kao vozač upravljajući vozilom marke „Audi 80“ sive boje, reg.oznaka 652-K-920 vl. njegovog oca Mahmutović Hasana, od Bihaća do Velike Kladuše, odnosno učestvovao u prevoženju 12 stranih državljana - Albanaca sa Kosova do neposredno pred granični prelaz sa R.Hrvatskom, a da samo prevođenje imigranata na graničnom prijelazu između BiH i R.Hrvatske na mjestu koje nije dozvoljeno za prelazak građana, kroz šumu ilegalno prevede Baftijari Faton, pa kada je, nakon što je u Bihaću Baftijari Faton smjestio u dva taksi vozila 9 lica i to: Ademi Sead, Ademi Bajram, Osmani Gzim, Brahimi Ibrahim, Mehmeti Besnik, Ademi Hanife, Florim Hasani, Ibishi Faton i Muji Ahmet, Mahmutović 4 lica primio u svoje vozilo, od kojih su trojica bili ilegalni imigranti i to: Avdulji Adem, Perparim Elshani i Isufi Meriton, kao i Baftijari Fatona, kojeg je također trebao prevesti do Velike Kladuše, gdje je prema planu organizatora, Baftijari Faton kompletnu grupu od 12 ilegalnih imigranata trebao prevesti u R.Hrvatsku, a zatim predati određenom licu, kako su to organizovali Mehić Hasib i Ismailji Hasan, kada su u mjestu Pećigrad bili kontrolisani od strane Granične policije, koja je utvrdila da se u vozilu pored Mahmutovića i Baftijarija nalaze ilegalni imigranti, nakon čega su svi zajedno, uključujući i 9 Albanaca doveženih od strane 2 taksi vozila na autobusku stanicu u Veliku Kladušu, bili lišeni slobode i privedeni u sjedište JGP, V.Kladuša.

Dakle, iz koristoljublja, omogućili drugima nedozvoljeni prelazak granice,

Čime su počinili krivično djelo krijumčarenja osoba iz člana 189. stav 1., a sve u vezi sa članom 29. KZ BiH.

Pa Sud,

Prvooptuženom Baftijari Fatonu na osnovu navedenog zakonskog propisa, te primjenom čl. 48., 58. i 59. KZ BiH izriče

UVJETNU OSUDU

Kojom mu se utvrđuje kazna zatvora u trajanju od 2 (dvije) godine i istovremeno određuje da se ova kazna neće izvršiti ako optuženi Baftijari Faton u roku od 5 (pet) godina od dana pravosnažnosti ove presude ne počini novo krivično djelo.

U slučaju opoziva uvjetne osude optuženom će se u skladu sa članom 56. KZ BiH u navedenu kaznu zatvora uračunati vrijeme koje je optuženi proveo u pritvoru počev od 04.11.2007 godine do 25.02.2008 godine.

Drugooptuženom Jasminu Mahmutoviću na osnovu navedenog zakonskog propisa, te primjenom čl. 48., 58. i 59. KZ BiH izriče

UVJETNU OSUDU

Kojom mu se utvrđuje kazna zatvora u trajanju od 2(dvije) godine i istovremeno određuje da se ova kazna neće izvršiti ako optuženi Jasmin Mahmutović u roku od 5 (pet) godina od dana pravosnažnosti ove presude ne počini novo krivično djelo.

U slučaju opoziva uvjetne osude optuženom će se u skladu sa članom 56. KZ BiH u navedenu kaznu zatvora uračunati vrijeme koje je optuženi proveo u pritvoru počev od 04.11.2007 godine do 06.11. 2007 godine.

Na osnovu člana 188. stav 1., a u vezi sa članom 186. stav 2. ZKP-a BiH optuženi Baftijari Faton se obavezuje na plaćanje troškova krivičnog postupka, a o kojima će Sud odlučiti posebnim rješenjem po pribavljanju relevantnih troškova, te iznosa paušala u iznosu od 100 KM, koje je dužan

platiti u roku od 30 dana od dana pravomoćnosti presude, dok se optuženi Jasmin Mahmutović obavezuje na plaćanje troškova krivičnog postupka u paušalnom iznosu od 100 KM u roku od 30 dana od dana pravosnažnosti presude.

O b r a z l o ž e n j e

Optužnicom broj KT-444/07 od 24.12.2007 godine, potvrđenom dana 10.01.2008 godine, Tužilaštvo BiH optužilo je Baftijari Fatona i Jasmina Mahmutovića zbog krivičnog djela krijumčarenje osoba iz člana 189. stav 1. u vezi sa članom 29. KZ BiH.

Optuženi Baftijari Faton i Jasmin Mahmutović, te branilac optuženog Baftijari Fatona, Senad Dupovac, advokat iz Hadžića, su dana 14.02.2008 godine, odnosno 30.01.2008 godine zaključili sporazume o priznanju krivnje sa tužiocem Tužilaštva BiH. Ovim sporazumima optuženi su priznali krivnju za krivično djelo krijumčarenja osoba iz člana 189. stav 1. u vezi sa članom 29. KZ BiH, učinjeno na način kako je to navedeno u činjeničnom opisu optužnice broj KT-444/07 od 24.12.2007 godine.

Tužilac i optuženi Baftijari Faton i Jasmin Mahmutović su se navedenim sporazumima saglasili da tužilac Tužilaštva BiH predloži Sudu BiH da optuženim za učinjeno krivično djelo, izrekne uvjetnu osudu kojom će im se za počinjeno krivično djelo utvrditi kazna zatvora u trajanju od 1 (jedne) godine do 2 (dvije) godine i istovremeno odrediti da se ova kazna neće izvršiti ako optuženi u vremenu ne kraćem od 4 (četiri) godine i ne dužem od 5 (pet) godina ne počine novo krivično djelo.

Na ročištu za razmatranje navedenih sporazuma o priznanju krivnje održanom dana 25.02.2008. godine, sud je utvrdio da su optuženi razumjeli sporazume, da su ih dobrovoljno i svjesno zaključili, zatim da su isti razumjeli da se na osnovu sporazuma odriču prava na suđenje, te da ne mogu uložiti žalbu na krivičnopravnu sankciju koja će im biti izrečena. Sud je upoznao optužene o mogućim posljedicama uključujući i posljedice vezane za plaćanje troškova krivičnog postupka.

Nakon toga, sud je ove sporazume u cijelosti prihvatio, smatrajući da je tužilac pružio dovoljno dokaza o krivnji optuženih Baftijari Fatona i Jasmina Mahmutovića.

Na pretresu za izricanje krivičnopravne sankcije održanom dana 25.02.2008 godine tužilac je predložio da sud od olakšavajućih okolnosti kod optuženih ima u vidu da isti nisu ranije osuđivani, njihovu starosnu dob, zatim da je Tužilaštvo do određenih dokaza došlo njihovim doprinosom, da su bili spremni da sarađuju sa Tužilaštvom, posebno ističući doprinos optuženog Jasmina Mahmutovića, kao i da su iskazali visok stepen kajanja zbog učinjenog krivičnog djela, te da je predložena sankcija optuženim srazmjerna težini učinjenog krivičnog djela.


Branilac optuženog Baftijari Fatona se u cjelosti pridružio navodima tužioca, ističući da je predložena sankcija optuženom srazmjerna težini učinjenog krivičnog djela te da će se istom ostvariti svrha uvjetne osude. Optuženi Jasmin Mahmutović je izrazio kajanje zbog počinjenog krivičnog djela, te pružio obećanje da neće u budućnosti činiti krivična djela.

Imajući u vidu sporazumom predloženu krivičnopravnu sankciju, Sud je kao olakšavajuće okolnosti na strani optuženih cijenio da isti nisu ranije osuđivani, njihovu mladu dob, da su optuženi priznali krivnju što je rezultiralo zaključenjem sporazuma o priznanju krivnje sa tužiocem. Navedena činjenica je u mnogome doprinijela bržem i efikasnijem okončanju postupka i smanjenju troškova, dok otežavajućih okolnosti na strani optuženih sud nije našao. Navedene olakšavajuće okolnosti koje su se stekle na strani optuženih, su po ocjeni ovoga suda takvog značaja da opravdavaju primjenu propisa o izricanju predložene uvjetne osude, i iste ukazuju da u konkretnom slučaju nije bilo neophodno izreći zatvorsku kaznu. Dakle, uzevši u obzir navedene olakšavajuće okolnosti, kao i odsustvo otežavajućih okolnosti, ovaj sud je ocijenio da je utvrđena kazna zatvora u trajanju od 2 (dvije) godine, sa periodom provjere od 5 (pet) godina, srazmjerna težini učinjenog krivičnog djela, te da će se i sa ovako utvrđenom kaznom zatvora postići svrha uvjetne osude propisana u članu 58. KZ BiH.

Na osnovu člana 188. stav 1. ZKP-a Sud je optužene obavezao da plate troškove krivičnog postupka u paušalnom iznosu od po 100 KM u roku od 30 dana od dana pravosnažnosti presude, kao i obavezao optuženog Baftijari Fatona na osnovu člana 186. stav 2. ZKP-a BiH na plaćanje troškova

krivičnog postupka, a o kojima će Sud odlučiti posebnim rješenjem po pribavljanju relevantnih podataka, uzimajući u obzir proizvedene troškove, prvenstveno troškove branioca po službenoj dužnosti.

Zapisničar
Bojan
Bojan Avramović



POUKA O PRAVNOM LIJEKU: Protiv ove presude nije dozvoljena žalba u odnosu na krivičnopravnu sankciju, dok se žalba iz drugih žalbenih osnova može izjaviti u roku od 15 dana od dana prijema pismenog otpiravka presude.